



INSTRUCCIÓN CONXUNTA DO 5 DE FEBREIRO DO 2019 DA SECRETARÍA XERAL TÉCNICA E DA DIRECCIÓN XERAL DE CENTROS E RECURSOS HUMANOS SOBRE CONDICIÓNS DE USO DO UNIFORME ESCOLAR

ANTECEDENTES

1. O Pleno do Parlamento de Galicia, na sesión do 20 de novembro de 2018, adoptou, entre outros, o seguinte acordo:

“O Parlamento de Galicia insta o Goberno galego a implantar e aplicar todas as medidas normativas e regulamentarias pertinentes para que, a partir do seguinte curso escolar 2018-2019, todos aqueles centros educativos que decidan que o alumnado leve uniforme escolar, non obriguen a un código de vestimenta diferenciado por sexo entre alumnas e alumnos, considerando en todo caso a opción de que as alumnas poidan elixir acudir ao centro educativo con pantalón”.

2. Entre a normativa estatal básica, a Lei orgánica 2/2006, do 3 de maio, de educación, inclúe entre os obxectivos das diferentes ensinanzas que regula a igualdade de xénero, con diferentes concrecións en función da etapa educativa:

O artigo 17.d), para educación primaria: *“Coñecer, comprender e respectar ... , a igualdade de dereitos e oportunidades entre homes e mulleres ...”*

O artigo 23.c), para educación secundaria obrigatoria: *“Valorar e respectar a diferenza de sexos e a igualdade de dereitos e oportunidades entre eles. Rexeitar os estereotipos que supoñan discriminación entre homes e mulleres”.*

O artigo 33.c), para o bacharelato: *“Fomentar a igualdade efectiva dereitos e oportunidade entre homes e mulleres, analizar e valorar criticamente as desigualdades existentes e impulsar a igualdade real ...”*

E o artigo 40.d) para formación profesional: *“Fomentar a igualdade efectiva de oportunidades entre homes e mulleres, ...”*

3. Entre a normativa autonómica, o Decreto legislativo 2/2015, do 12 de febreiro, polo que se aproba o texto refundido das disposicións legais da Comunidade Autónoma de Galicia en materia de igualdade (DOG núm. 32, do 17 de febreiro de 2016), regula no capítulo IV do título I diversos aspectos sobre a educación e a formación para a igualdade entre mulleres e homes, entre eles, a erradicación de prexuízos nos centros docentes (artigo 18):

“1. Non se admitirán, no centro docente, as desigualdades entre alumnos e alumnas sustentadas en crenzas, prexuízos, tradicións ou prácticas consuetudinarias transmisoras, directa ou indirectamente, dunha distribución estereotipada de papeis entre os sexos ou dunha imaxe de dominación dun sexo sobre o outro en calquera ámbito da vida.

2. De forma directa, as docentes e os docentes non permitirán ningunha forma de machismo e de misoxinia que puidese existir no seo da comunidade escolar e, nomeadamente, entre nenos e nenas e adolescentes, aplicarán activamente principios pedagóxicos de respecto á identidade e á imaxe das mulleres.

Con tales efectos, nos regulamentos internos dos centros educativos, deberán explicitarse as medidas de corrección ou sanción de comportamentos sexistas”.

4. Pola súa banda, a Lei 4/2011, do 30 de xuño, de convivencia e participación da comunidade educativa (DOG núm. 136, do 15 de xullo), regula no artigo 10 o contido do plan de convivencia e





as normas de convivencia cos que, segundo a lexislación vixente, deben contar todos os centros docentes, e nos que se integrará o principio de igualdade entre mulleres e homes.

Concretamente, o artigo 10.4 regula a vestimenta do alumnado nos seguintes termos:

“4. Así mesmo, as normas de convivencia poderán conter previsións sobre a vestimenta ou o xeito de presentarse do alumnado, orientadas a garantir que este non atente contra a súa dignidade, non supoña unha discriminación por razón de sexo ou un risco para a súa saúde e integridade persoal e a dos demais membros da comunidade educativa ou non impida ou dificulte a normal participación do alumnado nas actividades docentes”.

Así pois, a norma deixa á autonomía de cada centro a cuestión da vestimenta, en función da súa situación socioeducativa, pero fixa uns principios que deben servir de orientación e límite á hora de establecer esa regulación.

Por canto antecede, o Secretario Xeral Técnico e o Director Xeral de Centros e Recursos Humanos da Consellería de Educación, Universidade e Formación Profesional, ditan a presente INSTRUCCIÓN:

1. *Ámbito de aplicación*

Esta instrución será de aplicación en todos os centros educativos que decidan que o seu alumnado leve uniforme escolar.

2. *Criterios de uso do uniforme escolar*

De acordo coa normativa legal e regulamentaria citada nos antecedente desta instrución, e conforme co acordo do Parlamento de Galicia do 20 de novembro de 2018, os centros educativos que decidan que o alumnado leve uniforme escolar, deberán adoptar as medidas necesarias para que esta decisión non obrigue a un código de vestimenta diferenciado por sexo entre alumnas e alumnos, considerando en todo caso a opción de que as alumnas poidan elixir acudir ao centro educativo con pantalón.

Os centros educativos que decidan empregar uniforme escolar deberán concretar as pautas de uso nas súas normas de convivencia.

3. *Efectividade*

Os centros educativos, dentro da súa autonomía, deberán adoptar as medias oportunas para a súa aplicación a partir do curso 2019/20.

4. *Supervisión*

A inspección educativa supervisará o cumprimento da normativa e dos criterios de uso do uniforme escolar adoptados polo centro.

Santiago de Compostela,

Director xeral de Centros e Recursos
José Manuel Pinal Rodríguez

Secretario xeral técnico
Jesús Oitavén Barcala

(asinado dixitalmente)

